

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

1. जम्मू कश्मीर च विधानसभा चुनाएं दे खीरले गेड़ आस्तै राजनीतिक पार्टिं दे प्रचार होर तेज।
2. प्रधानमंत्री नरेन्द्र मोदी होर अज्ज जम्मू च चुनावी रैली गी संबोधत करगंन।
3. सुरक्षाबलें ते आतंकवादिं बश्कार कश्मीर दे कुलगाम च टाकरा जारी ऐ। पुलस नै अवंतीपोरा थमां आतंकिं आस्तै कम्म करने आले 6 लोकें गी हिरासत च लैता।
4. भारत ते बंगलादेश बश्कार मजूदा टैस्ट श्रृंखला दे दुए मैच दे दुए रोज अज्ज महमान टीम अपनी पैहली पारी गी त्रऊं विकटें दे नुक्सान पर 107 रंज कोला अग्गे खेडोग।

<><><><><><>

## Campaign

जम्मू कश्मीर ते हरियाणा च असेंबली चुनाएं गी दिक्खदे होई बक्ख-बक्ख सियासी पार्टिं दे बड्डे बड्डे नेता ते स्टार प्रचार अपने मेदवारें दे हक्कै च जोरें-शोरें प्रचार करै करदे न। जम्मू कश्मीर च त्रीए ते खीरले गेड़ तैह्त 40 सीटें लेई मतदान पैहली अक्तूबर गी होना ऐ। बीजेपी दे वरिष्ठ नेता ते प्रधानमंत्री नरेन्द्र मोदी होर अज्ज जम्मू च इक चुनावी रैली करै करदे न। कांग्रेस नेता प्रियंका गांधी बी अज्ज प्रदेश च रैलिं गी संबोधत करगंन। तोआई बीजेपी दे राश्ट्री प्रधान ते केन्द्री सेहत मंत्री जे.पी.नड्डा होरें कल जम्मू संभाग दे कटुआ च इक चुनावी रैली कीती। मगरा इक संवाददाता सम्मेलन गी संबोधत करदे होई नड्डा होरें आखेआ जे कश्मीर दे नोजवानें राश्ट्री मुख्खधारा गी चुनेआ ते आतंकवाद ते हिंसा गी नकारी दित्ता ऐ। विपक्ष दे नेता राहुल गांधी होरें बी जम्मू च रैलियां कीतियां। चुनाएं गी दिक्खदे होई पूरे जम्मू कश्मीर च सुरक्षा दे सख्त इंतजाम कीते गे न।

<><><><><><>

## Jammu PM Rally

प्रधानमंत्री नरेन्द्र मोदी होर अज्ज जम्मू च एम.ए.स्टेडियम च चुनावी रैली गी संबोधत करगन। एह रैली जम्मू संभाग च खड़ोते दे 24 पार्टी मेदवारें आस्तै चुनां प्रचार तैहत कीती जा'रदी ऐ। जम्मू च चुनाएं दे त्रीए ते खीरले गेड़ तैहत पैहली अक्टूबर गी वोट पोआए जांगन। आकाशवाणी जम्मू संवाददाता नै जानकारी दित्ती ऐ जे इस रैली गी "बीजेपी संकल्प महा रैली" दा नां दित्ता गेआ ऐ। जम्मू कश्मीर च होआ'रदे विधानसभा चुनाएं तैहत एह प्रधानमंत्री मोदी हुंदी चौथी रैली ऐ। एह मोदी हुंदी खीरली रैली होग कीजे चुनां दे खीरले गेड़ आस्तै चुनां प्रचार 29 सितम्बर गी खत्म होई जाग। जम्मू संभाग दी 24 विधानसभा सीटें दे मेदवार जम्मू कठुआ, सांबा ते उधमपुर जिलें थमां चुनां लड़ा'रदे न। बीजेपी दे वरिष्ठ नेताएं सनें एह मेदवार अज्ज दी रैली च मजूद होंगन। जम्मू जिले दे 11 चुनावी हल्कें सांबा च 3, कठुआ च 6 ते उधमपुर च 4 पैहली अक्टूबर गी वोट पोआए जांगन। प्रधानमंत्री रैली गी दिक्खदे होई प्रशासन नै सुरक्षा दे सारे बंदोबस्त कीते दे न।

<><><><><><><><>

## Mega SVEEP

जम्मू कश्मीर च जिला चुनां कार्यालय जम्मू नै शुक्रवारें मतदाता जागरूकता मुहिम चलाई जेहदे च तकरीबन 8 ज्हार कार्यक्रम आयोजित कीते गे ते इक्कै दिने च 80 ज्हार थमां मते बसनीकें एहदे च हिस्सा लैता। साढ़े संवाददाता नै दस्सेआ जे स्वीप कार्यक्रम दे तैहत एह मुहिम बड्डे पैमाने पर मतदाताएं गी जागरूक करने आस्तै चलाई गई। एहदे तैहत सारे जिला कार्यालयें, सेक्टरल कार्यालयें, मतदान केन्द्रें ते शिक्षा संस्थानें च मतदाताएं गी जागरूक करने आस्तै बक्ख-बक्ख कार्यक्रम आयोजित कीते गे। इनें कार्यक्रमें दा मुख्क उद्देश्य नमें मतदाताएं गी अपने वोट पाने दे अधिकार दी महत्तवा समझाना हा।

<><><><><><><><>

## Samba SVEEP

स्वीप कार्यक्रम दे तैहत जिला सांबा च बी मतदाता जागरूकता कार्यक्रम दा आयोजन कीता गेआ। सिंबलाना ग्रां, ब्लाक सुम्ब च आयोजित कार्यक्रम च लोकें बड़ी मती गिनतरी च हिस्सा लैता।

<><><><><><><><>

## Traffic Restrictions

ट्रैफिक पुलस जम्मू नै प्रधानमंत्री हुंदे दौरे गी दिक्खदे होई गडिडएं दी आओजाई आस्तै सलाह जारी कीती ऐ। अज्ज प्रधानमंत्री नरेन्द्र मोदी हुंदा जम्मू दे एम.ए.स्टेडियम च चुनावी रैली गी संबोधत करने दा कार्यक्रम ऐ। एहदे चलदे शैहर बक्खी गडिडएं दी आओजाई पर किश थाहरें पर रोक लाई जाग ते किश रस्तें दी ट्रैफिक गी बदलेआ जाग। लोकें गी चौथे तवी पुल यानि गुज्जर नगर पुल ते सेद्धड़ा पुल गी जम्मू उत्तर जम्मू थमां

दक्खन जम्मू तोड़ी आओजाई आस्तै इस्तेमाल करने गी आखेआ गोआ ऐ। रैली च हिस्सा लैने आलें गी दस्सी दी थाहरें पर गड्डियां लाने दी हिदायत बी दित्ती गई ऐ। ट्रैफिक सरबंधत मती जानकारी आस्तै तुस ट्रैफिक नियंत्रण इकाई जम्मू गी इनें नंबरें पर संपर्क करी सकदे ओ-नंबर न 0191-2459048 ते 94191-47732।

<><><><><><>

## Aru Village

केन्द्री सैलसफा मंत्रालय नै अनंतनाग दे पहलगाम इलाके च पौंदे आरू ग्रां गी भारत दे बेह्तरीन सैलसफा ग्राएं दे प्रतिष्ठित जेतुएं च शामिल करने दी घोषणा कीती ऐ। एह घोषणा कल विश्व सैलसफा दिवस दे मौके पर कीती गई। 2023 च शुरू कीती गेदी बेह्तरीन सैलसफा ग्रां प्रतियोगिता दा मकसद ऐसे ग्राएं दी शनाख्त करियै उनेंगी मानता ते पंछान दोआना ऐ जेह्ड़े अपनी सांस्कृतिक ते प्राकृतिक विरासत गी संजोइए रखदे न ते मकापमी समुदायिक मुल्लें कर्दें गी बी जींदा रखा करदे न। आरू ग्रां गी साहसिक सैलसफा दी श्रेणी च बेह्तरीन सैलसफा ग्रां घोषत कीता गोआ ऐ।

<><><><><><>

## PM Man Ki Baat

प्रधानमंत्री नरेन्द्र मोदी होर मन की बात कार्यक्रम राएं अपने बचार देश ते बाहरे मुल्खें दे लोकें कन्नै सांझा करगंन। एह कार्यक्रम कल यानि 29 सितम्बर गी बडलै 11 बजे आकाशवाणी पर प्रसारत कीता जाग। इस म्हीनेवार कार्यक्रम दी एह 114मीं किशत होग। त्रीह बारी प्रधानमंत्री बनने परेंत प्रधानमंत्री हुंदे इस कार्यक्रम दी एह चौथी किशत होग। मन की बात कार्यक्रम दा प्रसारण सारे आकाशवाणी ते दूरदर्शन नेटवर्क, ए.आई.आर वैबसाइट, न्यूज़ ऑन एयर मोबाइल ऐप पर कीता जाग। एयर न्यूज़, डीडी न्यूज़, पीएमओ ते सूचना प्रसारण मंत्रालय दे यूट्यूब चैनलें पर बी इस कार्यक्रम दा सिद्धा प्रसारण कीता जाग। हिंदी प्रसारण दे तुरत मगरा इस कार्यक्रम गी क्षेत्रीय भाषाएं च प्रसारत कीता जाग।

<><><><><><>

## Kulgam Encounter

कश्मीर घाटी दे कुलगाम जिले दे आदिगाम ग्रां च अज्ज बडलै थमां आतंकवादिएं ते सुरक्षाबलें बश्कार टाकरा शुरू होई गेदा ऐ। अधिकारिक जानकारी मूजब इलाके च आतंकवादिएं दी मजूदगी बारे इक पक्की सूह थ्होने पर सुरक्षाबलें दे इक सांझे दल नै इलाके गी घेरियै तुपाई अभियान शुरू कीता। जियां गै सुरक्षाबलें अपना घेरा तंग कीता तां उत्थें छपे दे आतंकवादिएं उंदे पर अन्नेबाह गोलियां चलाना शुरू करी दित्ता। शुरूआती जानकारी मूजब मन्नेआ जा'रदा ऐ जे उत्थें घट्टोघट्ट दऊं जां त्रै आतंकवादी मजूद न। खीरी जानकारी

थोने तगर रूकी रूकियै गोलीबारी जारी ही। होर ब्योरे गी बलगेआ जा करदा ऐ। तोआई जम्मू कश्मीर पुलसै आवंतीपोरा च आतंकवादिएं दी मदद करने आले 6एं जनें गी गिरफ्तार करियै उंदे कब्जे शा खरी मती मात्रा च थेआर, असला, गोली बरूद ते विस्फोटक दे इलावा किश एतराज जोग सामग्री बी बरामद कीती ऐ। दस्सेआ जा'रदा ऐ जे इंदा ताल्लुक पाकिस्तान आधारित आतंकी संगठनें कन्नै ऐ।

<><><><><><>

## CJI

न्यायधीश ताषी राबस्तान होरें कल जम्मू कश्मीर ते लद्दाख दे हाई कोर्ट दे मुख् न्स्यायधीश दे तौर पर संगंध लैती। अधिकारिक जानकारी दे मताबक जम्मू च आयोजित इक कार्यक्रम च राबस्तान होरें उपराज्यपाल मनोज सिन्हा हुंदी मजूदगी च अपने पद दी संगंध लैती।

<><><><><><>

## Chief Secretary Internet

मुख् सचिव अटल डुल्लू होरें कल जम्मू च जम्मू कश्मीर प्रदेश ब्रॉड-बैंड कमेटी दी बैठक दी अध्यक्षता करदे होई केन्द्र शासत प्रदेश च जारी ब्रॉड-बैंड मिशन दे कम्में ते प्रति दी समीक्षा कीती। मुख् सचिव होरें सरबंघत अफसरें ते अजेसिएं गी आखेआ जे ब्रॉड-बैंड मिशन गी समें सिर मुकम्मल करने लेई लोडचदियां औपचारिकतां तौले पूरी करी लैतियां जान। उनें ग्रामीण विकास मैहकमे ते बीएसएनएल गी आष्टिकल फाइबर केबल बछाने लेई पंचैतें दी तैआरी ते पैहले उपलब्ध कराए गेदे वी-एसएटी दे कम्म करने दी स्थिति दा सर्वेक्षण बी तौले करी लैन।

<><><><><><>

## Holiday Cancel

जम्मू दे जिला मैकजस्ट्रेट होरें 30 सितम्बर गी जम्मू जिले दे सब्बने स्कूलें च छुट्टी बारे पैहले जारी हुक्म गी रद्द करी दित्ता ऐ। कल जारी अपने नमें हुक्मै च उनें आखेआ ऐ जे 30 सितम्बर गी जम्मू जिले दे सब्बने सरकारी ते प्राइवेट स्कूलें च छुट्टी रखने बारे पैहले जारी हुक्म गी वापस परताई लैता गेआ ऐ।

<><><><><><>

## Cricket

कानपुर च खेड्डे जा'रदे भारत ते बंग्लादेश बश्कार मजूदा श्रृंखला दे दुए टैस्ट मैच दे दुए रोज अज्ज महमान टीम अपनी पैहली पारी दे त्रऊं विकटें दे नुक्सान पर 107 रंज कोला अगगे खेडोग। कल पैहले ध्याड़े मोमीन उल हक 40 ते मुश्फीक उर रहीम 6 रंज पर खेड्डा'रदे हे जिसलै दपैहरी'लै भारी बरखा दे चलदे खेड्ड रोकना पेआ। मेजबान टीम दी तरफा अकाशदीप नै दऊं ते रविचन्द्रण अश्विनी नै बंग्लादेश दा इक खडारी आउट कीता। एहूँ शा पैहले कल बडलै भारत नै टॉस जित्तिथै बंग्लादेश गी बल्लेबाजी करने लेई आखेआ। दऊं टैस्ट मैचें दी इस श्रृंखला च मेजबान टीम चिन्नेई च खेड्डेआ गेदा पैहला टैस्ट मैच 280 रंज कन्नै जित्तिथै 1-0 कन्नै पैहले गै अगगे ऐ।

<><><><><><>